

Einem jeden berckarbeiter / sol aus bewegenden vr-
sachen / auff diesem Berckwerge zwo schicht zufaren
nachgelassen sein.

Wan̄ neue kluffte vnd genge

erbauet vñ entblöst / wie darauff gemuthet
vnd auffgenommen werden sol.

Nach dem sich auch / auff vnserm Berckweg sich
albereit zugetragen / vñnd forder nach dem willen
Gottes begeben möcht / das die gewercken auff
stollen / in zechen / lehen vnd massen / mit ihrem gelt /
neue kluffte vnd genge erbauen / vnd entblößen / die gute
zwitter füren / welche der erbarkeit vñ billigkeit nach von
ihren dienern / Schichtmeister vnd Steiger / auch den er-
beitern billich ihnen zu gut solten gemuth vñ auffgeno-
men werden / nicht allein ein fundtgrubē / Sonder mehr
lehen vnd massen / Nach dem es aber von ihnen zuzeiten
vorlast / vñ andere mit nutzeten die nicht dohin verbau-
et haben / eher dann sie zu vnserm Bergkmeister kōmen /
Darzu etzliche diener vnd erbeiter / vorseztiglich auff dem
neuen entblosten gengen oder geschicken / nit mehr dann
ein fundtgrube / den gewercken muthen / vnd ihnen die
negsten massen darnach zuziehen / darinnen vnbillicher /
vnd vorteilhafftiger eigener nutz gespürt wirdet.

Ordenen vnd wollen wir / auff was gependen sichs
begeben vnd zutragen möchte / darauff man trostliche
anweisung / von zwittern auff neuen gengen entblößen
wirdet / Das darauff die schichtmeister vnd steiger ihren
gewercken zum wenigsten ein fundtgruben / mit beiden
nechsten massen muthen / vñ was also dan̄ darnach vor
lehen sein mügen / sie die fur sich auffnehmen / vñ also fort
an